

Persediaan pengebumian pahlawan Perak berjalan lancar

Oleh AMIZUL TUNIZAR AHMAD TERMIZI

TAIPING 8 Sept. - Liang lahad untuk mengabadikan semula jenazah Orang Kaya Menteri Ngah Ibrahim Jaafar yang dibawa pulang dari Singapura hari ini telah siap digali di halaman rumahnya di Kota Ngah Ibrahim yang kini dinamakan Kompleks Sejarah Matang, dekat sini.

Kerja-kerja penggalian yang bermula dari pukul 9 pagi dan selesai pada pukul 2 petang itu dilakukan oleh tiga pekerja di bawah seliaan Ketua Kompleks Sejarah Matang, Othman Abu Kassim.

Menurut jurucakap kompleks sejarah itu, pihaknya mengambil keputusan menggali kubur Ngah Ibrahim lebih awal bagi mengelakkan sebarang kesulitan di saat-saat akhir terutama jika terjumpa binaan bersejarah di tapak kubur yang digali itu.

"Kalau kami gali esok, mungkin ambil masa untuk cari tapak baru jika ada binaan bersejarah di tapak ini tetapi kalau setakat artifak, ia boleh dialihkan," katanya ketika ditemui di sini hari ini.

Tinjauan Utusan Malaysia di Komplek Sejarah Matang mendapati persiapan rapi sedang dijalankan bagi menyambut kepulangan jenazah pembesar Melayu terkaya pada abad ke-13 yang dijadual dikebumi-

kan Sabtu ini.

Tinjauan mendapati kerja-kerja mengecat semula rumah Ngah Ibrahim telah siap dijalankan, manakala kerja-kerja membina jalan dan laluan pejalan kaki di kawasan makam itu sedang dijalankan.


Jenazah Ngah Ibrahim dan Laksamana Mohamad Amin Alang Ouakap dibawa menaiki kapal Tentera Laut Diraja Malaysia (TLDM) dari Pelabuhan Tanjung Pelepas pada pukul 4 petang ini.

Di samping itu, Jabatan Warisan turut membawa pulang binaan kubur Ngah Ibrahim dan Mohamad Amin dari Singapura dan dijangka tiba di Kompleks Sejarah Matang tengah malam ini.

Bagaimanapun, belum dipastikan sama ada binaan itu akan digunakan pada makam kedua-dua pahlawan Melayu itu atau untuk dipamerkan kepada orang ramai.

Sementara itu, Orang Besar Jajahan Manjung, Toh Muda Mohd. Khairi Ahmad Tazalli ketika dihubungi memberitahu, kerja-kerja menggali makam Mohamad Amin di Makam Diraja Bukit Chandan, Kuala Kangsar juga telah selesai hari ini.

Makam Mohamad Amin ditemui di Pusara Abadi, Chua Chu Kang, Singapura oleh tiga warga negara itu yang kemudiannya memaklumkan kepada Mohd. Khairi tiga tahun lalu.



PEKERJA-pekerja semalam sibuk menyiapkan liang lahad untuk menempatkan jenazah Ngah Ibrahim yang akan dibawa pulang ke Kota Ngah Ibrahim, hari ini.

Makam Ngah Ibrahim pula ditemui di Perkuburan Al-Junid pada 4 Ogos 2004 oleh piutnya, Orang Kaya Menteri Paduka

Datuk Dr. Wan Mohd Isa Wan Ahmad yang merupakan Orang Besar Jajahan Larut Matang dan Selama.